



Iulissat, 21. juuli 2016

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqqut imaattoq saqqummiuppara:

Naalakkersuisunut apeqqut:

- 1. Aalisakkanik tunitsiveqarnikkut umiarsualiinerit sumiiffinni sorlerni aasaq manna atorpeqarpat?**
- 2. Misilittakkat maannamut qanoq ippat?**
- 3. Naalakkersuisut aalisartitseqatigiiffiup Polar Seafood-ip siunissaa pillugu ilisimasaqarpat imaluunniit tassunga tunngasunik saaffiginnittoqarsimavaa?**
- 4. Naalakkersuisut qanoq iliuuseqarsinnaappat Polar Seafood nunami allamiunut soqutiginnittunut tunineqassagaluarpat? Tassani aalisakkanik pisassiissutigineqartartut eqqarsaatigalugit?**
- 5. Apeqqut 3-mi Polar Seafood nunami allamiunut tunineqassagaluarpat, pisassiissutit ingerlatseqatigiiffimmiit tigummiinnarneqarsinnaaneri inatsisitigut tunngavissaqarpa?**
- 6. Naalakkersuisut qanoq isumaqarpat? Polar Seafood nunami allamiunut tunineqassagaluarpat, aarlerinissamut pissutissaqarpugut?**

(Inatsisartunut ilaasorta, Anthon Frederiksen, Partii Naleraq),

Tunngavilersuut:

Piffissami sivitsulersumi ilatigut tusagassiutitigut eqqaallattaarneqarpoq, aalisartitseqatigiiffik Polar Seafood nunami allamiunut tunineqaratarsinnaasoq.

Naluneqanngilaq aalisarneq nunatsinni inuussutissarsiutit pingaarnersarigaat, aammalu pisassiissutit nunatsinni aalisartunit ilaatigut naammagineqaratik amingarineqartartut.

Taamaammat Polar Seafood-ip nunami allamiunut tunineqaratarsinnaanerata inatsisitigut kingunerisinnaasai erseqqissumik paasissallugu assut soqutigaarput. Tassani pingaartumik pisassiissutit aningaasarparujussuarnik nalillit nunami allamiunut tutsinneqassappata tamanna miserratiginagu Partii Naleqqamit assorujussuaq akuersaaruminaatsissavarput.

Taamaammat inatsiseqarnikkut pissutsit qanorpiaq ittuuneri aammalu aalisagartassanut tunngasut qanoq pineqassanersut paasilluassallugit soqutigaarput.

Aarleqqutigigatsigu Polar Seafood aalisartitseqatigiiffilluunniit nunami allamiunut tunineqaraluarpata, tamanna nunatta aningaasarparujussuarnik annasaqaatigeratarsinnaagaa.

Ullut suliffiit qulit qaangiutinnginnerani akineqarnissara kissaatingaara.